



Il viadi sill'Alp Glivers en accumpignament da lamas.

FOTOS MAD

Da cavalcar ed igl emprem agid entochen viseta egl uaul

Il pass da vacanzas dalla Pro Juventute Cadi las davosas duas jamnas ei vegnius visitaus stediamein

DA HANS HUONDER/FMR

■ 254 affons e juvenils ein separticipai al pass da vacanzas dalla Pro Juventute Cadi. Cun quei ei la participaziun stada sur la media. «Nus havein sentiù la situaziun cul coronavirus. Biaras famiglias ein sedecidas da passentar las vacanzas a casa e cheutras havein nus era giu dapli annunzias», di *Lucas Tuor* che presidescha la Pro Juventute Cadi dapi rodund quater onns. Il program ei danovamein staus grond e surtut era varioris. Tut en tut han las participontas ed ils participonts saviu eleger ord in catalog cun rodund 65 differents arranschaments ni luvratoris. Per la fin dallas duas jamnas dil pass da vacanzas han ils responsabels nudau en tut 970 frequenzas. La purschida ei danovamein stada animonta: Sils fastitgs d'Alois Carigiet, beach sport, viadi cun carrotscha cumbinaus cun in pic-nic, smincar e tgirar la pial, dar troccas, decorar muffins, dar golf ni era la veta dils aviuls, lavurs da me-



Decorar muffins ei buca mo creativ, mobein fa era appetit.

tal, malegiar, mirar steilas ed emprender d'enconuscher il program dil Photoshop. Far pizza, baghegiar roboters, sittar cun

ballester han interessau aschibein sco dad ir cun skateboard e visitar ils pumpiers e la polizia.

Interess fetg different

«Per plirs arranschaments havein nus giu dapli annunzias che plazs. En plirs da quels eis ei numnadamein stau pusseivel da risguardar mo org del, annunzias havein nus denton giu il dubel. Sch'igl ei stau pusseivel havein nus lu purschiu quei arranchament dublamein ni ch'il computer ha la finfinala stuiu far la selezziun tgi ch'astgi separticipar», di Tuor ch'ha era saviu sefidar uonn sin in team da persunas responsablas fetg engaschadas. Ina clara tendenza, tgei purschida ch'ei il mument il hit, ha buca saviu vegnir constatada: «Quei ei fetg different. In arranchament ch'ei staus da pauc interess avon dus onns ei staus occupaus uonn fetg bein. Magari dependa quei d'in ni l'auter participont ch'animescha lu ulteriurs da separticipar ed aschia ei il diember lu spert contonschius.» Tendenzialmeins ei denton era semussau



Il contact cun cavals e forsa era aunc astgar cavalcar fascinescha, surtut las buobas.

uonn che la purschida cun aua ei d'interess, aschia lavar aur ed ir alla pesca, ni river rafting ch'ei vegniu offeriu per l'emprema ga.

Mo era la purschida da cavalcar e far striegn – medemamein in element niev – han cattu fetg buna resonanza. Mirau sur tut ora di il president: «Nus essan fetg cuntents culla participaziun ed il decuors dil pass.» Dil reminent: Per l'emprema ga han era affons e juvenils d'Andiast e Vuorz saviu separticipar al pass da vacanzas dalla Pro Juventute Cadi, quei suentar la fusiun dils dus loghens cun Breil.

Coronavirus negin problem

Il pass da vacanzas dalla Cadi ei vegnius arranschaus uonn d'in team da sis persunas. Danovamein eis el vegnius sustenius d'in bi diember da gidontas e gidonters. «Senza quellas e quels mass quei secapescha buc. Dad ina vart pervia dalla cumpetenza, da l'autra vart pervia dalla concentraziun dalla purschida sin duas jamnas», constatescha Tuor. Il pass da vacanzas porscha numnadamein

buca mo arranschaments da divertiment e passatemp, mobein era elements che promovon igl inschign e la savida. Mo buca mo il sustegn da voluntaris ei pils organisatur d'eminente impurtonza, mobein era il sustegn finanziel da biars sponsurs. Pervia dil coronavirus han entgens elements dil pass buca saviu vegnir purschi. Aschia per exempel la viseta tiel militar ni el spital: «Che nus sappien buca porscher quei ei stau da preveser spert.

Quei ei era buca stau in problem damai che nus havein saviu comunicar quei fetg spert.» Baul la primavera seigi ei denton buca stau clar schebein ins sappi insumma organisar quei pass uonn: «Quei mument ch'igl ei stau clar che nus sappien porscher pli u meins igl entir program essan nus sefatschentai dallas mesiras da segirtad e higiena necessarias. Tuts gidonters ein vegni orientai e da tuts arranschaments ei era vegniu menau gliestas da preschientscha.» Per part seigi ei stau necessari da purtar mascras. Era uonn ei il «Büga» staus integraus ella purschida.



River rafting ei stau ina dallas purschidas novas.